

YONI Napa 1

Ai koyoto epi'ehina fayahi

*Minoba minoba huto minolatanamofihu
bagaguti kalo mino'ehina*

¹ Me'i hapi huto huto hinaguti ka ema'alo mino lito buto mino'ehina to legekesatu kehel'i'ohuta to lubutu bu go'ohuta to lubutu bu goya ito bu goloto layatu li kehelito bu go'ohutamo ya'ma minoba minoba huto minolatanamofihu bagaguti ka'alo nominana bo'mu fayahi ya'ma koyoto nolepube.

² Minoba minoba huse'namofihu legeya'a huto hu lamana hulago lali bu goloto minoba minoba huto mino lito buto minose'namofihu ka'a ya'ma lu huto huto lu lepilata nohune. Minoba minoba huto mino lito buto minolatana ya'ma miyagu afotifitoga mino lito buto minoto alih'a lalitoga huto hu'ehina. ³ Yamofihu ya'ma bu goto lito hu'ohutamo ana huto lenalitoga lu lepilata nohutamo ya'ma lu lepilenogo ai kumu komopati monekotoga bati huto hepito minalune luto hulata nohune. To ana huto lenali hiti lali hiti komopati hepi lamana higo nominoto afotifitoga to pana'a Yesu Kilisito aitoga hepito minalune luto yabe. ⁴ Ya suhi huto huto hilenogo komopatigu sabiyana lolo hu baga ilibe luto fayaha nasana ya'ma koyoto nolepube.

Hu'ma fana meha'a hiti mino'ehina ka'a

⁵ Ka'a ya'ma Hu'mamofahi pana'amofahi baga'aguti ma luto kehel'i'ohutamo lu lepilata nohune. Hu'mau ai sinihina'a ya'ma aitoga mone meni'ibe. Fana meha'a besa loto asaga'na mino'ehinamo ni'ibe. ⁶ To lali foipanamofahi metepunagu nominototi to Hu'mamofi hiti komopati monekotoga moloto bati huto hepi'ohune luto liluta ya'ma faga hiti liluta'mu yabe. ⁷ Hu'mau ai ya'ma fana meha'a hiti bo nohibe. To ana huto lali ai'a fana meha'agu mino moloto nohuto ai hiti moneko'na huto komopati hepito bati huto minaluta'mu yabe. To ya hinogo pana'amofahi Yesu, ai'a golaha'auba foipanati asaga'i okala hu letoto minomo buto minalibe.

⁸ Lali foipanati meni'ibe luto liluta ya'ma komopati faga noluta'mu yabe. To ka lamana'amo komopatigu meminolata nohibe. ⁹ Ya hu'ehinaya to foipanati Hu'mamofitoga lu huto nohunogomo ai eto'ehina bo to faga melulata nohina boubia ai ka'a beto huto'a foipanati nokala huto asaga foipanati li he'mi leto su halina'mu yabe. ¹⁰ To ai foipanatini lilata nehabe luto noligo lali foipanati mehu'ohune luto nolutoti ya'ma Hu'mamofi kumu fagalo bo yabe luto lulata nohuto to ya'ma ai kaga'a komopatigu meminalina'mu yabe.

2

Kilisitou lehe'molata bo nohibe

¹ Panana'ni lenali foipana hi lalabe luto ka'ni ya'ma fayah i koyoto nolepube. To moneuba foipana hulenogo afotifu, Hu'mau foipanati'mu ka foya nolinogo lehe'malina bo mone nohina

yabe. Ai gi'a Yesu Kilisitou ai fotogo huto nohina bouba ai lali kumu yabe luto miyagu afotifu aitoga buka tilina'mu yabe. ² Kilisitou ai'a ya'ma foipanati'mu Hu'mamofifi le'mo fulu hulata bo nohibe. To ya'ma lali foipanatigo ya hu letalata meni'ibe. Noto noto bona'i silaga kumu yabe luto foipana'ani li he'mi epololata bo nohibe.

³ To ya higo lali ai'a bona'a nominototi Hu'mamofifi kehelilune? Ai kaga'a lu laga huto lu'ehina'alo mege'i mololata nohuta ya'ma keheliya iluta'mu yabe. ⁴ To bona'i moneuba ai ka lu laga huto hu'ehina ka'alo mege'i memalalinauba nani Hu'mamofifi bona'a nohube luto lu'ehinalo ya'ma fagalo bo yabe. Bona'i ya hana'amagihi komopa'anigu ka legeya'a meni'ibe. ⁵ To bona'i moneuba ai Hu'mamofifi ka'alo mege'i malalina'a ai komopa'a Hu'mamofitoga emi'ehina yamofifi legeya'a ahuto hu su ho'ehibe. Ya hulago ya'ma Hu'mamofitoga i segito bati hulata nasanamofifi legeya'a ya suhi huto huto hileno bu goloto akehelilune. ⁶ Lali Hu'mamofitoga i hepitohuta bona'i nohune luto liluta'amagita Yesu Kilisito minoto lito hu'ehina yamofifi babeyafalo minaluta yabe.

Lu molo'ehina ka kosaba'i

⁷ Komopa'ni lepi'ohuna bona'ise. Nani lu molo lepololata ka kosaba'i mone lu melepube. Ya'ma koyapa hapa'agati kehe lelite bite mine'ahanamo ya'ma ka'a lu lepi'ahanamo yamofifi lu kosaba huto koyoto lu nolepube. ⁸ To ka fayahi nokoyona ya'ma lu molo'ehina ka'a kosaba'i lolo nohibe.

To ana kaga Yesutoga to lalitoga lamana'a huto legeya'a lolo hulata nohigo melugu bona'magi bu negana yabe. Ya higo metepuna su halube'mu nohigo fanato lamana huto besa nolana yabe.

⁹ To bona'i luga'amagi fana meha'agu nohune lite lilana to enalalu'anighi enita bite enemegesa hu epilana'amagi ya'ma enali metepunagu yatai neminanamo ni'ibe. ¹⁰ To luga'amagi enali enalalu'anighi komopa'ani epite minalana'amagi enali ya'ma Hu'mamofhi fana meha'agu bati hite neminabe. Ya hite neminana bona'magi foipa nasana'mu enohoka hilina bo enalitoga mone huto mehilina'mu yabe. ¹¹ To enali enalalu'anighi enita bite enemegesa hu epilana'a enali ya'ma metepunagu neminana yabe. To metepunamofhi kapolo melete nebagu metepunauba komopa'animofhi bu'a li fili kenogo kapo ya'ma bu ge fe lite bu megalana'mu yabe.

¹² Lenali pa'ni pana'ni nehanamagita, Yesu Kilisitohi gi'alo yabe luto foipanatini li he'mi lepolo'ehinamo ni'ibe. Ya huto ni'inagi fayah i ya'ma koyo nolepube. ¹³ To lenali olopa bona'magita minomo buto mino'ehina bo ai kumu keheliya ite keheli'ahanamo ni'inaya lenali'i ka'a ya'ma fayah i koyo nolepube. To neheya kola lenali foipanamofhi afo'agita amuya melete luba hite be ligi'ahanamo ni'inagihe. Ya hi'ahana'mu ya'ma fayah i koyo nolepube.

¹⁴ To lenali pa'i pana'i nehanamagita, Hu'mau afotinifihi hapa'a keheliya ite keheli'ahana'mu yabe luto fayah i ya'ma koyo nolepube. Olopa

bona'magita, lenali ema kanaguti hapi fi'ehina minomo tito nohina bomofiji ai kumu keheliya ite keheli'ahanamo ni'ibe luto kaga ya'ma fayah koyo nolepube. Neheya kola, lenali amuya malana'mu yabe luto to Hu'mamofiji kaga'a komopatinigu ni'igo foipanamofiji afo'afifi be ligi'ahana'mu luto kaga ya'ma fayah koyo nolepube.

¹⁵ Lenali asaga'i metoga minoto nohuta suhi to me'mofiji gupisa'alo nasana huto huto ni'inalo komopatini yanaga mebino. Enali komopa'ani ya'ma me'mofiji gupisalonamofito minalina enali komopa'ani ya'ma miyagu afo'anififi emilana'a meni'ibe. ¹⁶ Nekehelihe? Melugu nasana silaga'i ya'ma lugufa'auba topa holata nohina nasana to lubu'uba bu golata nohina nasana to komopati mega lugufa lelito tise'na ya'ma miyagu afotifitogati nasana meni'ibe. Ya'ma me'mofiji gupisalonamofitogati yabe. ¹⁷ To me'mofiji gupisa'alo ana'ina to enipa hina nasana hiti asaga'na su hoto mone yupahi fenene hilibe. To enali Hu'mamofiji bagaguti ka'a kehelite mege'i nemalana'a enali mineme bite mino hetofa hite minalana'mu yabe.

Kilisitohi fatehe bona'magi lataha'anilo ka

¹⁸ Palala'ni pana'nimagitabe, kana'a ya'ma hum-pamone'i asu halina'mu yabe. Ya'mu lenali Kilisitohi fateha'a huto hilibe lite keheli'ahabe. To yatai fatehe bona'a babu lite huto hilet mine baga i'ahabe. Yana'mu ya'ma kana'a su ho lamana hu'ehibe luto akeheli'ohune. ¹⁹ Kilisitohi fatehe bona'a enali lalitogati he'mi letete

bi'ahanamagi, lali ligibo lagabo lamana'a bati huto minolata'na ya'ma lolo hite menehabe. Enali lalalutigi bati hite nehatita ya'ma mehe'mi letatita ni'ibe. To he'mi lete'ahana yamofifi hapa'a ya'ma huto huto hu'ehibe. Lali hiti nehana'a enali lalalutigi lolo hite memine'ahana, keheliya i'ohune.

²⁰ Ya hi'ahanaya, Kilisitou ai hetofa Sikalafu'a ho lifigo komopatinigu tito nominago lenali asaga'i Hu'mamofifi ka lamana'a keheli baga i'ahana yabe. ²¹ Ya'mu luto fayahi ya'ma koyoto nolepube. Lenali ka lamana'a mekehelibe luto ni'igopa, ka lamana'a kehelilata nehana'mu yabe, luto ya'ma fayahi koyoto nolepube. To ya huto ya'ma keheli'ahabe. Fagalo bona'i asaga'i ya'ma ka lamana'amofifi komopa'aguti mone huto mehu'ehibe.

²² Fagalo bona'i ya'ma enali kumu kehelilune. Bo moneubafi moneuba Yesu ai'a gulu ho letalibe luto le'mo ho lifi'ehina bo Kilisito menohibe luto nelinogomo ai kumu ya'ma fagalo bo yabe luto kehelilune. To enali ya'ma miyagu afotifi hiti to ai pana'a Yesu Kilisitohi enemegesa hi etimilana bona kumu enali Kilisitohi fateha'a yabe. ²³ Enali Hu'mamofifi pana'amu enemegesa hi emilana ya'ma ana suhi huto afo'afi kumu hiti enemegesa hi emilabe. To enali pana'alog a hepito minete ai Hu'mau ho lifi'ehina bo, Kilisito nohibe lite lu huto hilana enali afo'afitoga ana huto neminabe.

²⁴ Lenali hapa'agati koyapa'i mono ka'a kehelite mine lite mine'ahana yamoga keheli melete minalo. To ya'ma kehelite nehitie miyagu afotifitogago pana'amofitogago hepite

mine melete bati hilana'mu yabe. ²⁵ To ya'ma Kilisitou lele'mo lamana hilibe luto lu molo leto'ehinamo ya'ma minoba minoba babeyafalo minolata'namo ya'ma ni'ibe.

²⁶ To lenimi'i melete komopatini le'mo sibina hilana bona'i enali ka'animu ma luto fayah nokoyobe. ²⁷ To lenalitoga Kilisitou Sikalafu'a molo epololata nohina ya'ma lenalitoga nominago mege'i melelata nehago yana'mu bo moneuba faga hiti lamana ka hiti henabe luto lu moloto lu lepilibe? Yamofahi ya'ma meni'ibe. Sikalafu'a molo lepolo'ehina ai ka'a asaga'i guyaka guyaka lito lu lepilata nohina nohibe. To ai ka'a ya'ma faga hiti meni'ibe. Lamana'ago ni'inago yana'mu Sikalafu'uba lu lepi'ehinamo ya'ma keheliya ileté Kilisitohi komopa'agu minalo

²⁸ Palala'ni pana'nimagitabe, lenali komopatini bati hinogo minete Kilisitou ai nehetilina kana'a huto hu lamana nohinogo koli mehise amuya melete nehago olenogo lubuya mehuse minalune lite ai'a komopa'agu minalo. ²⁹ Hu'mau bebe salata nohinalo nohibe lite lenali kehelihilanamo ya'ma to enali fotogo suhi hite minalata nehana bona'i enali Hu'mamofahi yagapan'a nehana yabe luto anokehelune.

3

Hu'mamofahi yagapan'a nohune

¹ Bu galo. Afotifu ya'ma komopa'a sipi huto limiloto pa'nibe, pana'nibe luto lu leto'ehina. Komopa'a limilata'na hofa toto minago lali ai yagapan'a bati huto nominone. Yana'mu

melugu bona'magi Hu'mamofitoga meneminana enali laliti hapati menekeheli. Hena'mube? Hu'mamofihī hapa'a mekeheli'ahanamo ni'ibe. ² Komopa'ni lepi'ohuna bona'ise. Lali ya'ma yata'isi Hu'mamofihī pa'i pana'i nohutagi, to minoto hena hena babeyafalo huto hiluta ni'ibe. Yamofihī hapa'a mele'isi huto hu lamana meno-hina'mu ma luto keheli'ohune. Kilisitou huto hu lamana hilina yupahi ai'a babeyafa'a bu go bati hulototi ai babeyafaloko minaluta'mu yabe. ³ To ya huto ni'igo lali asaga'i yamofihī fifa ito minaluta ya'ma Kilisitou ai komopa'agu bati huse'na'a ni'ina ya suhi huto minalune luto komopati li keheli keheli hiluta'mu yabe.

⁴ Foipa nasana lilata yanauba Hu'mau lu laga hu'ehina ka'a ligofa ho he'milata nasana ni'ina mone'amagi enali foipa nasana nelinogomo enali'i Hu'mau lu laga hu'ehina ka'a ya'ma ho hauta hi'ahabe. ⁵ To lenali Kilisitohi hapa'a ya'ma kehelilata nehabe. Ai foipa nasana ligoli hulata hilube luto huto hu'ehina ni'ibe. Ya no-huto aitoga ya'ma foipana'a meni'ibe. ⁶ Yamofihī lali Kilisitou hiti mino hepito minolata nohuta foipana huba huba huto meminalune. To luga'amagi foipa nasana lolo hilata nehana enali Kilisitohi hapa'a bu go bati hite bu galana'a hiti kehelilana'a hiti menehabe.

⁷ Palala'ni pana'nise, mone'amagi ete laga mehina ka ya hilo lite lu lepinogo ka'ani mekehelilo. Kilisitou ai mino fotogo huto minolata nohinagi to bona'i luga'amagi ana suhi hite bati hina suhi hilata nehinogomo enali kumu ya'ma fotogo hite neminana bona'i yabe luto lilune. ⁸ To

luga'amagi foipana lilata minalana enali Sataha bona'a neminabe luto lilune. Satau ai foipa nasana koyapa emagati lelito buto mino'ehina. To liloto nohigo Hu'mamofiji pana'auba ai'a Satahi foya'a ya'ma laga huto li sibi sibi huto he'milube luto oto huto hu'ehinamo ni'ibe.

⁹ Luga'amagi enali Hu'mamofitogati huto hi'ahana bona'magi Hu'mamofiji meha'a lite mine'ahanamo ni'inaya, enali foipana lilete meminalana'mu yabe. Hena'mube? Enali Hu'mamofitogati lusi bona'a ahuto hi'ahanagihe.

¹⁰ Hu'mamofiji pa'a pana'a to Satahi pa'a pana'a enali hapa hapa'ani ya suhi huto ya'ma huto nohigo bu galune'mu nohune. Luga'a mino fotogo hite meminalana'mu enali kumu Hu'mamofitogati menehabe luto nokehelune. To enali komopa'ani ya'ma enalalu'anighi meepinogomo enali kumu Hu'mamofiji bona'a menehabe luto ya'ma ana huto lilune.

Komopati ai eminogo ai eminogo huto minalune

¹¹ Ya'ma ka yata'a kanaguti lenali kehelite biba biba hi'ahana ya'ma huto ni'ibe. Komopati ai eminogo ai eminogo huto ya suhi huto minalune. ¹² Koyapa'i Atahi pana'a Keniu ai'a kapolo mebilune. Ai foipanamofiji pana'a lolo huloto gona'a ho fili'ehinamo ni'ibe. To henabe luto ho fili'ehibe? Hapa'a ya'ma huto ma ni'ibe. Ai'a minoto lito hu'ehina'a laga mehu'ehina yagi to gona'auba mino'ehina ya batu hu'ehina yabe. Ya higo gona'amofiji siko hu etoto ho fili'ehina yabe.

¹³ Nalalu'nigita, ma melugu Hu'mamofitoga meneminanamagi libe gofa hebe hite ya nehi lepelenogomo kehelilete topa mehalo. ¹⁴ Lali komopati ya'ma lalalutigihi epilata nohutamo ni'inagihe. Ya'mu lali filise'na kapo'aguti he'mito oto mino kosaba'nagu mino'ohutamo ni'ina kehel'i'ohune. To luga'amagi enali komopa'ani ai eminogo ai eminogo menehanamagi enali ya'ma filise kapogu nebana yabe. ¹⁵ To luga'amagi enali enalalu'anigihi enele'mo bati mehinogomo Hu'mau ya'ma enoho fililata bo suhi hite komopa'ani hiti nehabe luto lu epalalibe. To lenali enoho fililata bomu'i akehelilata nehabe. Enali minoba minobanamofifi babeyafa'a lolo hite menehabe. ¹⁶ Yesu Kilisitou ai lali kumu yabe luto minoto lito hulata'a he'milotu fili'ehibe. Ai ya higo komopati ai eminogo ai eminogo hiluta hapati li yege holago bu go'ohune. Yana'mu lali ana huto lalalutigihi enali kumu luto minoto lito hiluta'a ya'ma he'miluta babeyafalo enalitoga minalutamo ni'ibe. ¹⁷ Bona'i luga'a enali yaga nose'na to fe'noho nasanauba babu luto ni'igo to enalalu'anigihi enumuhi meni'igo nehinogo bu gelete to komopa'ani hekini lete meenehe'malata nehanaya enali kumu ma luto kehelilune. Komopa'ani Hu'mamofitoga mone memalalata nehabe luto keheliloto ya lilune. ¹⁸ Palala'ni pana'nimagitabe. Lali komopati Hu'mamofi hiti lalalutigi hiti noeprito ya'ma kagatuko to labagagutiko melilune. Komopatiguti layatuko to labagatuko luto moloto hilune.

Hu'mamofifi gobisalo komopati le'mo moneko

hilune

¹⁹ Komopati epiba epiba luto ya lusiga nolunaya ya'ma hinogoti ka'a lamana'amofahi yagapan'a nohutamofahi hapa'a huto hulenogo bu goloto kehelilune to komopatiuba loe lae mehinogomo Hu'mamofahi gobisalo komopati le'mo hephilune. ²⁰ Foipa nasanamofahi fisu hite nelinogo kaga komopatigu ni'inogomo ma luto lilune. Hu'mau ai'a komopatimofahi babeyafa suhi meni'ibe. Ai fato suhi huto komopatimofahi babeyafa'a be ligise'na minoto ana'ina keheli bati huto kehelilata nohibe. ²¹ Komopa'ni lepi'ohuna bona'ise, foipa nasana'mu ka foya liluta ka'a komopatigu meni'inogomo Hu'mamofahi gobisalo kuyugu keyege mehuse bati huto minaluta'mu yabe. ²² To ka'a kehelilototi ai bulo minoto moloto nohunogo bati hulata nohibe. Ya'mu ya'ma aitoga lutogo limilata nohibe. ²³ Ka'a lu molo'ehina ka ma luto ni'ibe. Pana'a Yesu Kilisitohi ai gi'alo kehelito mino ule'ale huloto ai lu leto'ehinamofahi suhi huto komopati ai eminogo ai eminogo huto minaluta ni'ibe. ²⁴ Enali lu molo'ehina ka'a keheliya ite mege'i malalana'a enali Hu'mau hiti hepi lamana hite neminenogo Hu'mau ai'a komopa'anigu mino ho tito minalina'mu yabe. To ai Sikalafu'i molo leto'ehinamo ai'a lu limilago Hu'mau ai'a komopatigu minoto ho tito hulata nohibe luto kehelilata nohune.

4

*Ka'a mone Hu'mamofitoga ni'ifi meni'ifi luto
keheli fe lilune*

¹ Komopa'ni nolepuna bona'ise. Sikalafu'uba lele'mo babahi higo lulata nohune lite lilata nehana bona'i asaga'magitoga ka'a ya'ma sibigopa mekehelilo. Kaga'a mone ya'ma Hu'mamofitogati ni'ifi meni'ifi keheli fotogo hilune lite kaba hilo. Ka'a leli'ali bona'i fagamofihī silaga'i huto hilete babu li'ahana ni'ibe. ² Hu'mamofihī Sikalafu'a yauba enele'mo bati higo ka nelana ya hite bu galabe. To enali Hu'mamofihī pana'a Yesu Kilisito ai lusi bo gufa'a hiti bo lolo huto neheti'ehinamo ni'ibe lite li huto hite lilana enali Hu'mamofitoga nehabe luto kehelilabe. ³ To luga'amagi enali Yesu kumu ya lite melinogomo ya'ma Hu'mamofitogati menehabe. Enali Kilisitohi fatehe bona'mofihī ka'a nelabe. Ana fatehe bomofi kumu akeheli'ohune. Ai metoga alahi huto hilibe luto lu lepugo keheli'ahanamo ni'ibe. To yatai ya'ma ai'a amuya'a ahuto hu'ehibe.

⁴ Palala'ni pana'nise, lenali Hu'mamofitogati huto hilete faga mono ka leli'ali bona'magihi amuya melete luba hite, ya suhi hite enebe ligi'ahanamo ni'ibe. Hiya hutobe? Lenali komopatinigu minolata nohina ai amuya'auba metoga nohina bo foipana'a ai'i amuya'a ya'ma be ligi'ehinagihe. ⁵ Faga mono ka leli'ali bona'i enali ya'ma me'mofihī gupisalo ni'inana'muko kehelilata nehabe. Lilago meluguti bona'magi enegekesagu li melelata nehabe. ⁶ Lali ya'ma Hu'mamofitogati huto hu'ohutamo ni'inaya enali Hu'mamofihī bona'a nehana'amagi ya'ma lali kaga kehelilata nehabe. Hu'mamofitogati huto mehi'ahana ya'amagi lali kaga menekehelibe.

Yamu'i lali ka lamana'amofahi hapa'a to le'mo sibi hulata'na ka legeya'amofahi hapa'a yaguya bu go bati huto hulata nohune.

Hu'mau keke'i lu letolata bo nohibe

⁷ Nemehi nolepuna bona'ise. Enemehi epilata'na ya'ma Hu'mamofitogati ni'ibe, ya hu'ehina'mu lali komopati ai eminogo ai eminogo huto minalune. Enali komopa'anitu eniginaga fi epite minalana enali ya'ma Hu'mamofitogati huto hi'ahana yabe.

⁸ Hu'mamofahi hapa'a ya'ma komopa'a limilata'na ni'inagihe. Ya higo luga'amagi enali komopa'anitu keke'i li epalalana meni'inogomo Hu'mamofahi hapa'a bu mege'ahabe luto keheli'ohune. ⁹ Hu'mau aitogati minoba minoba huto minolata'na li huto huto lilube luto gi moneko pana'a metoga ho lifigo limi'ehina. Yamofahi mehi limi'ehinamofahi hapa'a lalitoga huto hu lamana hu'ehibe. ¹⁰ Komopati epilata'namofahi hapa'a ma huto ni'ibe. Lali kohe toto komopati meemi'ohutogo ai'a ya'ma komopa'a limito pana'a ho lifigo limi'ehina foipanati su halinamofahi kapo bili leto'ehina.

¹¹ Komopa'ni nolepuna bona'ise. Hu'mau komopa'a sipi sipi huto limi'ehinagi yana'mu lali ana huto komopati ai eminogo ai eminogo huto minalutagihe. ¹² Bona'magita Hu'mamofahi bu galuta'a ya'ma mone bu mego'ohune. To komopatitu lemehi emilata nohuta yanaguya huto moloto hiluta ya'ma Hu'mau komopatigu minoto

lito nohilinamofhi hapa'a li huto hilibe. To komopati emiluta yanauba huto hu lamana hulata nohibe.

¹³ Hu'mau ai Sikalafu'a molo leto'ehinagihe. Ya limi'ehinamu'i ai'a lali'i lele'mo maha'aluga mololata nohigo yanagu minota, to ai komopatigu minoto ho tito nohina ya'ma keheli fe lu'ohune. ¹⁴ Afotifu ya'ma pana'a lali noto noto bona'i lubuto bilibe luto ho lifigo limi'ehina. To lali lubu legeya'aloti bu go'ohutamo ni'inaya ka'a ya'ma luto lu huto hulata nohune. ¹⁵ To bona'magi Yesu ai lamana'a Hu'mamofhi pana'a nohibe lite lu huto hilana'a enali Hu'mamofhi komopa'agu minalune'mu nehabe, to Hu'mau ana huto komopa'anigu minoto lito hilina'mu yabe. ¹⁶ Hu'mau komopa'a limilata nohina'a ya'ma bu goto keheli'ohune. To keheliya ito keheli'ohune.

Hu'mamofhi hapa'a ya'ma mehi limilata'namofhi nohinagihe. Enali komopa'ani emite bite minete lite hilana'a enali Hu'mamofhi komopa'agu minalune'mu nehabe. To Hu'mau ai komopa'anigu minoto lito hilina'mu yabe. ¹⁷ Ya'mu komopati emilata nohuta ya'ma bati huto huto hu lamana hulata nohibe. Kilisitou ai metoga minoto lito hulata hu'ehina suhi huto lali minolata nohuta ni'inaya yamofhi ka foya lise kana'a sipilo lali koli mehuse amuya moloto ho ti fefe luto minalune. ¹⁸ To hena'mube? Komopati epilata'namofhi legeya'auba ya'ma lelesa luse'na ya'ma fife lu halina'mu yabe. Ya hu'ehina'mu enali enelesa luse'na lite minalana enalitoga komopa'ni emise'na huto hu lamana mehu'ehibe luto kehelilune. Hena'mube?

Lahalifi, lite koli nehana yabe. Enali Hu'mau komopa'a limilata'namofifi hapa'a mone mekeheli'ahana yabe.

¹⁹ Lali ya'ma Hu'mau kohe toto komopa'a limi'ehinamo ni'igo yamu'i lemehi ai emilata nohune. ²⁰ Bona'i luga'amagi enali Hu'mamofifi lemehi emilata nohune lite lilete to enalalu'anigihi enita bise'na hite enele'mo bati mehilana enali kumu ya'ma fagalo bona'i yabe luto kehelilune. A'nekehelihi? Enali enalalu'anigihi enubutuko bu galana'a enali komopa'ani meepise minalana ya'ma Hu'mamofifi bu megolata'namofifi ai ya'ma komopa'ani meemilune'mu nehabe. ²¹ Kilisitou lu molo'ehina ka'a ma luto kehelilata nohune. Lenali Hu'mamofifi komopatini emite nehanamagita lenalalutiniglihi ya'ma komopatini ana hite epilo.

5

Metoga nasana ho fililinamofifi hapa'a

¹ Bona'i luga'amagi Yesu kumu Hu'mau le'mo ho ti'ehina bo yabe lite keheliya ilana enali kumu Hu'mamofifi yagapan'a nehabe luto lu epalalune. To ya huto ni'igo ya'ma afo'anifihi komopa'ani emilana enali ana hite yagapan'a hiti komopa'ani epilabe. ² Lali Hu'mamofifi pa'a pana'a komopati epilata nohupihe luto ya nohupi ya menohupi luto ya'ma Hu'mamofifi komopati emitto to ai lu molo'ehina ka'alo mege'i melenogoti yanauba lu huto hilina ya'ma akehelilune. ³ Hu'mamofifi

komopati emilata nohutanamofahi hapa'a ma huto ni'ibe. Ai lu molo'ehina ka'asigo kehelito analo mege'i mololototi ya'ma komopati noemuta ni'ibe. Hu'mau lu molo'ehina ka ya'ma keheli emilatanamofahi keta'a hiti meni'ibe. ⁴ Hu'mamofitogati huto hu'ohuta ya'ma asaga'naloga lali me'i gupisa'alo ni'ina nasana i matele unogo batihune. Ya'ma matele unogo limilata nohina amuya'a ya'ma Hu'mamofahi lemehi emilatanati ya'ma ni'ibe. ⁵ To me'mofahi gupisa'alo ni'ina nasana i lapasa inogo limilina bona'i kiyi'agi kiyi'agi nehabe? Enali Yesu kumu ya'ma Hu'mamofahi pana'a nohibe lite lilete keheli ule'ale hite kehelilana enalisigo yamofahi lolo hilune'mu nehabe.

*Hu'mamofahi pana'amofahi ka'a le'mo amuya
molo'ehina ka'a*

⁶ Yesu Kilisito ai'a ya'ma nagami'a hiti golahi huto hu'ehina yabe. Nagami'asigo meni'ibe. Ai nagami folose nagami'a hiti to fililago limi'ehina golaha'a hiti huto hu'ehina yabe. Sikalafu'uba ai ka'a lamana'amofahi afo'afu nohinagihe, to Sikalafu'uba ya'ma hapa'a lulata nohigo legeya'a henilata nohibe. ⁷⁻⁸ Yamofahi Sikalafu'i ai'a to mono nagami'i folo'ehina yauba to ya'ma fililago limi'ehina golahi ya nasanauba ya'ma enali loebe monebe nehago ka li'ahana ka ya'ma moneko legege hu'ehina ka ni'ibe. Enali ka Yesu Kilisito Hu'mamofahi pana'a nohibe lite nelabe. ⁹ To bona'magita lenayahi tite ma'naka nolune lite nelago lali kehelutogo batihuleta nohibe. Ya hu'ehinaya Hu'mau lu'ehina ka'a yauba be ligito amuya mololata

nohibe. Ai lusiga lulata nohibe. To ai Yesu kumu nani pana'ni nohibe luto alu'ehina yabe.

¹⁰ Ya luto ligo enali Hu'mamofifi pana'amofi kumu enemehi emilana'a enali komopa'anigu keheli lamana hilata nehabe. Luga'amagi enali Hu'mamofifi pana'auba ka'a lu'ehina kamu'i keheligo futu'a lolo hu'ehinamo ni'ibe, ya'ma bona'i ya hana'amagihi Hu'mamofifi kumu fagalo bo yabe lite li'ahanamo keheli'ehibe. ¹¹ To Hu'mau pana'amofihi hapa'a le'mo hetofa hu etoto ka'a lu'ehina ya'ma ma huto ni'ibe. Hu'mau amuya lemehi huto minolata nasana li huto huto limi'ehina ya'ma mino kosaba huse'namofifi hapa'a ya'ma pana'a nohibe. ¹² To ya higo enali Hu'mamofifi pana'a li pili kete lite minalana'a enali mino kosaba huse nasana ali'ahanamo ni'ibe. To luga'a enali Hu'mamofifi pana'a li pili mekalana enali mino kosaba huse'na ya'ma meli'ahabe luto lilune.

Lemehi emitō minoba minobanamofifi ka'a

¹³ Hu'mamofifi pana'amu lenemehi emi'ahana'a lenali ya'ma keheli ule'ale huto minoba minoba nasana ya'ma ali'ahabe. Li'ohune lite keheli fe lite kehelilabe luto ka'a ya'ma koyo nolepube. ¹⁴ Lali ya'mu luto Hu'mamofifi bulu koli mehuse keheli bati hu'ohune. To Hu'mamofitoga ana'ina mone kumu loka hotogo ya'ma ai'a lilina'a malalina'a komopa'agu bati nohinogomo keheli limilina'mu yabe. ¹⁵ To ana'ina mone'namufi mone'namufi kehe i etenogo keheli limilibe luto keheli fotogo hu'ohutamo ni'ibe, ana'ina mone kumu kehe

iluta ya'ma mele'isi li layanugu mololata nohibe luto keheli'ohune.

¹⁶ Bona'i moneuba lalu'afu moneuba foipa nasana nolinogomo bu goloto filise kapolo le'mo malalina nasana ya'ma lolo mehuse'namofifi nohinogomo bu goloto ya'ma ai kumu luto Hu'mamofitoga foipana'a li he'mi etobo luto ya libe. Lulenogo Hu'mau foipana'a li he'mi etoto mino kosaba huse kapolo le'mo malalibe. To filise kapolo le'mo malalina nasana ya'ma foipana hu'ehina'a mone ni'ibe. Ya hu'ohuta'amu Hu'mamofitoga lilata foya lilabe luto menolube. ¹⁷ Bona'magi bati mehina hapa'a hilatana'a asaga'i foipana ni'inaya, foipa nasana luga'a ya'ma filise kapolo enele'mo memalalina'mu yabe.

¹⁸ Lali ma luto kehelilata nohune. Hu'mamofitogati huto hi'ahanamagi ya'ma foipana lite meminalana'mu yabe. Hu'mamofifi pana'auba yagapana'amagihi li pili koto kaba hu epeelenogo foipa nasanamofifi afo'afu enugufalo mone'a li mekehelilina'mu yabe.

¹⁹ Lali Hu'mamofitogati huto hu'ohuta ya'ma noto noto melugu bona'i mone'amagi asaga'nalogi enali foipanamofifi afo'afu ai nosipenuga kete nehabe luto keheli'ohune.

²⁰ To ma luto mone'a hiti keheli'ohune. Hu'mamofifi pana'a ai'a melugu limito keheli fe lulata'na li huto hu limi'ehinamo ni'inaya, Hu'mamofifi lamana'amofifi hapa'a keheliya ito kehelilata nohune. To Hu'mamofifi ka lamana'alo i segito ya'ma pana'a Yesu Kilisitohi nosipenuga minoto lito nohune. Ai'a ya'ma

Hu'mamofiji lamana'a to minoba minoba
huse'namofiji afo'afu nohibe.

²¹ Palala'ni pana'nise, lenali laga mehinana
faga lugefa nasanalo lenemegesa hu emite kaba
hite minalo.

**Ka Lamana'a Mono'i Lu Mu Tifi'ehina Ka
Yabe
The New Testament in the Benabena Language of
Papua New Guinea
Nupela Testamen long tokples Benabena**

copyright © 1982 Wycliffe Bible Translators, Inc.

Language: Bena-bena (Benabena)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-09-26

PDF generated using Haiola and XeLaTeX on 11 Nov 2022 from source files
dated 9 Oct 2020

429cb299-5ab9-51c4-8857-9de5c72f8388